

光緒重修天津府志

重修天津府志卷四十

傳二

宦績二

國朝

目錄
許汝霖 職官外

魏象樞

朱軾

雷興 督撫

沈文奎

張存仁

李蔭祖

王登聯

朱昌祚

甘文焜

金世德

于成龍

格爾古德

于成龍

郭世隆

李光地

趙宏燮

蔡珽

李紱

唐執玉

劉於義

李衛

孫嘉淦

史貽直

高斌

方觀承

周元理

楊景素

鄭大進

劉綦

梁肯堂

胡季堂

顏檢

熊枚

陳大文

吳熊光

裘行簡

邢彥成

蔣攸銛

屠之申

松筠

曾國藩

熊伯龍

學政

吳國對

李應薦

楊名時

吳襄

趙大鯨

吳文鎔

馬騰陞

鹽政

余縉

江繁

莽鵠立

三保

徵瑞

李如枚

文謙

丁思孔

司

朱宏祚

邵嗣堯

王謩

沈起元

吳士功

陸費瑯

裴宗錫

韓文綺

吳廷棟

丁壽昌

秦鉞

任璣

靳襄

蔣林

倪象愷

盧見曾

董承勳

陳樹著

嵇承志

孫泳

黃世發

職官外

徐永順

道

薛柱斗

重刊天津府志卷之二 官績

石天樞

朱士傑

陳宏謀

陶正中

王師

宋宗元

喬人傑

沈長春

李鑾宣

張起鵬

王奐

河間府

徐可先

張璨

李梅賓

天津府

劉君成

胡文柏

熊繹祖

靈毓

金文瀄

黃立隆

李紹元

興安

恆春

錢忻和

石贊清

高必大

顧高嘉

凌燾

職官外

張可立

錢蔭南

孟淦

平聖垣

徐而發

天津縣

張志奇

朱奎揚

熊恩紱

彭良鸞

申允恭

李符清

陳鳳翔

吳之勳

陸費元鑽

周栻

王大猷

毛永柏

謝子澄

譚正瓏

楊霞

青縣

劉允恭

嚴霖

周碩勳

葉志寬

沈聯芳

何蘭馨

金大鏞

謝棠

尙應武

杜旭

劉文振

法寔

靜海縣

吳貽誠

史寶徵

石拱極

馮澧

劉煦

汪安瀾

許榮昌

滄州

龐宗周

申偉抱

祖澤潛

李永純

閔三元

王洪遠

姚孔瑄

董思任

張奎祥

徐世作

周世聚

秦光辰

寶景燕

潘國詔

李億

郭紹會

沈如潮

陳鍾祥

劉體中

項桂輪

孫文驄

白龍昇

南皮縣

何中舉

馬士瓊

魏運世

鍾諤 職官外

王永茂

錢廣居

鹽山縣

董良性

費鉉

朱鸞鸞

黃貞麟

熊士晉

楊可喬

商衡

胡以昭

劉慶麟

尹式芳

劉文彥

張必科

慶雲縣

李芳春

張碩抱

徐州牧

盧元培

李居一

李興祖

韓契

吳煥

李炳生

金士仁

孫爾周

完顏岱

汪菁

張元英

胡懋謙

梁可薦

楊芳

任鼎

趙良棟

總兵

藍理

黃廷桂

丑達

永昌

蘇甯阿

薛大烈

周天命

遊擊

李崑

張德遠

沙春元

張化龍

守備

張傑

德成

駐防

鳳翔

興成

德音

廣多瑞

慶瑞

雙和

添祥

慶恩

卓啟斯

素奪魁

武成

鳳鳴

貴明

察興阿

桂連

坤祥

劉世祿

劉松山

職官外

郭松林

許汝霖海甯人進士康熙閒以禮部侍郎督理子
牙河務有築隄浚河功居民德之祀青縣名宦祠
前志 蔡啟盛案三輔之治以水爲大然或爲市
惠一方致害大局則功不掩過此治子牙全河使
果青縣獨祀卽涉疑似矣况府祠實同何前未覈
也又此卷下引大臣列傳名臣傳先正事畧暨外
省諸志者俱本新通志難照上卷悉注且迄未檢
校原書惟以郡內各志參考案據補正仍各注明
與前一律

魏象樞字環谿一字庸齋蔚州人順治三年進士
選庶吉士明年改授刑部給事中性格骨鯁敢言事
尤注意於當世人才賢不肖治術得失民生休戚
是是而非非必盡意乃止康熙十九年任刑部尙

書明年與少宰科爾坤巡察畿輔單騎按行墨吏
豪家皆斂迹爲除泰甚者若而人積勞得疾引退
二十五年薨於家

賜祭葬如例諡敏果雍正八年

詔入祀賢良祠

先正事畧 案祀名宦祠自應著沒世
不忘之由故此雖炳若日星亦爲補傳

朱軾字若瞻江西高安人康熙甲戌進士雍正三
年奉

命與怡賢親王共治畿輔營田水利發帑金百萬爲經費
軾悉心營度以漳衛盜陽子牙永定灤潞諸河爲
經以趙北口東西兩淀爲咽喉蓄洩得宜慨田六

千頃尋合疏請分直隸諸河爲四局南運河及臧家橋以下之子牙河苑家口以東之淀河爲一局請令天津道總理北運河爲一局請裁分司令通永道兼理苑家口以西各淀及畿南諸河爲一局請改大名道爲清河道管理下部議行

先正事略

雷興遼陽人正黃旗漢軍舉人順治元年十月授天津巡撫時土賊李聯芳張成軒嘯聚滄州南皮閒興同總兵婁光先督師進剿成軒等竄追至海口扼其去路賊驚潰投水死者大半興復遣兵搜捕餘黨斬其渠魁散其脇從疏言大沽海口爲

神京門戶請置戰船以備海防下所司議行二年調

陝西巡撫

名臣傳

案此文雖歷詳其來去之年月然與下篇以一事並屬二帥無所軒

輒已似未覈據前志職官下注三年任又注二年添設與此不符攷平寇約在二年或平後調去乎

沈文奎浙江會稽人明諸生順治元年授保定巡

撫時保定等府州縣徵納賦課猶沿襲明季舊例

有優免太濫致虧正額者亦有取盈攤派刻薄厲

民者文奎奏定悉照正條一切陋規概行禁革又

疏請各衛所地畝錢糧令州縣徵收屯丁兼屬管

攝凡軍宅屯莊概入保甲且於邊戍旣裁軍裝雜

派之需應行革除諸疏並見採擇四月天津土寇

李聯芳張成軒等橫行南皮鹽山間聚眾干人文
奎遣都司楊澄守備徐景山等率精銳閒道星馳
擒勦復與天津道陳鵬舉等分路追襲擒斬聯芳
等九十三人

特旨嘉獎

同上案東華錄作王文奎然鄉
先達相傳是沈不知曾姓王也

張存仁字完真正黃旗本籍浙江人順治七年總
督三省駐節大名翦榆園巨寇燕南以甯庚寅

詔令考校守令文藝存仁躬蒞各郡命題面試居官廉幹
者有一二語通曉卽注上等否則文雖佳亦乙之
監司請其故存仁曰我武臣也

朝廷命我校文我第考實文有偽實難欺也眾皆歎服

康熙初崇祀名宦

舊通志

李蔭祖漢軍正黃旗蔭生順治十一年授直隸山

東河南總督加兵部尙書銜疏請豁免被災州縣

秋糧又以流民令歸原籍恐道殣者多請隨地安

集卽時散賑

名臣傳

並請免逃人連坐之令

舊通志

又

疏言禁止海船恐魚鹽米麥不能轉運請令官爲

列號稽察出入則商民俱便疏並下部議從之

名臣傳

康熙二十五年祀名宦

舊通志

王登聯奉天人隸漢軍鑲紅旗順治十七年官保

定巡撫時海宇初定伏莽尙多官吏艱於緝捕互相容隱登聯請嚴縱盜之法重窩主之律厚捕首之賞由是盜賊屏息康熙元年裁順天巡撫以登聯兼理其事加工部尙書銜河間大名所屬災先後奏請發粟賑濟全活者多五年冬以撥圈旗地擾民密疏請令各安舊業言甚痛切忤釐拜意論死旗民哀之八年

特旨復原官

賜祭葬諡愨愨祀直隸名宦

先正事略

朱昌祚字懋功山東高唐人隸漢軍鑲白旗康熙

四年授三省總督五年抵任會鼇拜圈地議起遣部臣會同督撫經理旗民鼇拜然咸泣訴失業昌祚上疏極陳其不便鼇拜怒革職逮問矯

旨竟予立絞八年鼇拜伏罪

特諭昭雪復原官

賜祭葬如典禮諡勤愍祀直隸浙江名宦祠

甘文焜字仲明江西豐城人隸正藍旗漢軍康熙六年巡撫直隸先是郝惟納以督撫親巡屬邑官吏因緣派累民間奏罷巡歷例文焜疏言巡撫不巡視所屬則吏治民隱無由悉知請仍巡視但申

嚴苛擾例禁則不肖之人知儆而實心任事者得盡職守疏上

特詔允行著爲令文焜單騎巡所部禁暴恤郵緝姦除盜知無不爲疏報保定眞定等屬秋雨爲災請全蠲歲賦其已徵夏稅流抵來年得請復劾昌平順義懷柔密雲文安各州縣遲報水災論如例七年擢雲貴總督十二年吳三桂反殉節於鎮遠諡忠果俱同上

金世德字孟求遼東鐵嶺衛人隸正黃旗漢軍康熙七年官直隸巡撫八年疏言各省設布政按察

二使總理錢糧刑名直隸以京畿獨不設惟八道
員各管一府其圈地州縣以鄰縣地撥補退出者
分還各州縣不盡係一道管屬彼此牽混難稽至
提解犯人隔界推諉會審參差臣查各省道員有
屯田督糧驛傳全管通省例請於直隸八道中改
設糧道巡道各一駐省城總理事歸畫一不致舛
誤部議改直隸通薊道爲總理錢穀守道霸昌道
爲總理刑名巡道駐保定府十二年疏言直隸事
務殷繁長蘆鹽政巡撫勢難兼顧請仍差御史專
理下部議行名臣傳卒之日官民悼慟崇祀名宦保定

府志

于成龍字北溟山西永甯人康熙十九年任直隸巡撫知縣某經道府揭報具牘訐告成龍疏請嚴定反噬挾制律著爲令因災疏請緩征並平糶

詔卽以平糶之米作賑會早步禱雨立沛禾黍重歧三穗

民號曰于公穗尋劾青縣知縣趙履謙貪黷狀論

如律

先正事略

陞兩江總督加太子太保卒諡清端兩

省並崇祀名宦雍正十一年入祀賢良祠

舊通志

格爾古德滿洲鑲藍旗人姓鈕祜祿氏康熙二十
年官直隸巡撫二十二年疏言自鬻投旗之人或

有作奸犯科冀逃法網者或有遊手好閒規避差徭者本主聽其仍居本籍放債牟利則諱旗而稱民遇官長訪聞窩逃構訟等事又舍民而稱旗抗避不出甚或招搖鄉里魚肉小民應責令本主止留務農人戶於屯莊餘俱收同服役嚴定縱徇處分得請二十三年疏言順天永平保定河閒等府民田圈作旗產者向以別州縣之地撥換仍聽彼處民人佃種令業戶收租供職遇佃種不償則額賦無出其佃地所屬州縣因錢糧考成無涉不爲催租致受撥之地多有積逋官民俱累請自後令

佃地所屬州縣代爲征解仍按未完分數與奏銷一例處分疏下部議行六月疏薦井陘道李基和靈壽知縣陸隴其盧龍知縣衛立鼎尋以疾請解任七月卒於官諡文清二十六年祀直隸名宦名臣傳

于成龍漢軍鑲黃旗人康熙七年由廕生授樂亭知縣十八年擢通州知州二十一年直隸巡撫于成龍遷兩江總督疏薦其可大用尋爲江甯知府旋擢安徽按察使二十四年陞直隸巡撫頗行

諭詢畿輔重地利弊應興革者宜何先成龍奏弭盜爲先

奸惡之徒倚仗旗下名色窩藏匪類有司明知而
莫敢深究嗣後有如此者臣當執法治之既抵任
先後察究武清易州等處怙惡不悛之旗人舊通志
旋任河道總督三十七年二月以總督銜管直隸
巡撫事三月興修永清固安至張協七十里舊隄
挑濬渾河淤沙十旬竣工

詔錫名永定河建廟以祀三十九年三月卒於任

賜祭葬如例諡襄勤雍正八年入祀賢良祠名臣傳康熙五

十年祀名宦舊通志

郭世隆漢軍鑲紅旗人康熙二十九年官直隸巡

撫三十年二月疏言直隸守巡二道分管通省錢糧刑名與各省布按二司無異應改部選爲請

旨簡授下部從之三十三年四月以霸州等處因子牙河

隄決田畝被淹已賑濟平糶其大城縣趙扶村之南隄青縣之楊村隄至東子牙隄雄縣蒲淀五百淀之東隄請卽修築又黑龍港河及王家口久經淤塞請開濬深通疏入得請旋擢閩浙總督卒祀

直隸名宦

名臣傳

李光地字晉卿福建安谿人康熙九年進士三十七年授直隸巡撫清勤自勵尤盡心於農田水利

三十八年以漳水與滹沱合易泛濫議導漳河由
運達海以分滹沱之勢光地疏陳挑濬之法報可
次第訖工因奏霸州永清宛平良鄉固安高陽獻
縣濬新河占民田百三十九頃請豁其賦額從之
三十九年以子牙河屢汎濫自河閒以北靜海以
南皆被害隨

聖祖臨視命光地於獻河兩岸築長隄西接大城東接靜
海互二百餘里又於廣福樓之焦家口開新河引
水入淀由是下流益暢無水災光地以隄工旣成
請開諸州縣水田引漳溢滹沱大陸諸水資灌溉

薦同知許天馥爲河閒知府司其役從之四十四

年十一月授文淵閣大學士先正事略卒諡文貞祀名

宦雍正十一年

特旨入祀賢良祠

舊通志

趙宏燮陝西延安人監生康熙閒兩任天津道建

義學減徭役杜行帖修隄防興利除弊善政不可

枚舉河東地方明屬錦衣衛後屬餉司卒屬天津

道康熙十九年改隸武清民甚不便公前後兩任

力言於上官皆不允行及督直省乃一再上疏卒

得請而復隸天津西沽向無津梁行者病涉公捐

俸製巨艦貫以鐵索排列水面爲浮橋從此行旅往來如履平地焉卒諡肅敏祀名宦士民復立專

祠於三汊河岸

天津縣志

蔡珽漢軍正白旗人康熙三十六年進士雍正三年署直隸總督時直屬被水賑濟復發帑修河閒靜海諸城以工代賑珽奏言省會米價昂貴請令臬司浦文焯至天津運截留漕米二萬石於保定平糶留萬石接濟沿途地方得請並再運通倉米一萬石往天津聽珽調度加賑一月儻不敷用著珽奏明增發珽奏條約十四款一察參地方官侵

官一重懲胥役捏報一嚴訪衿棍挾制若貧士膏
火無資一體給賑一飭地方官親查賑恤一貧民
戶給印券以杜重冒一預示賑期勿致淆混一俟
漕米入倉開賑未免守候應令五十里內居民卽
於水次赴領遠者因地酌通一各屬倉儲不敷賑
給者先計限成數均給撥令米至補領一造冊遺
濫者許自首改正一災黎外出來歸者續報給賑
一舞弊胥役卽重處地方官失察治如溺職例一
三月之米全數給與恐愚民費耗應分兩次散給
一每村各給村名紙旗依次給領以免踐踏一派

武弁巡查以防搶奪又言賑滿三月便續修城工賑時所給印券領米後仍給本人修城日驗券傭工不待更查至玉田豐潤兩城亦殘壞請一體估修均如所請旋調補吏部尙書

名臣傳

李紱字巨來江西臨川人康熙四十八年進士雍正元年以兵部右侍郎截留湖南等幫漕糧於天津收漕二年三月督運抵通得

旨嘉獎初李紱署吏部侍郎因議敘年羹堯子富等捐造營房一事不肯從優爲羹堯所嫉及截漕估變米價盈餘銀五千兩交守道桑成鼎貯庫紱赴廣西

巡撫任成鼎以原銀解交紋以事屬直隸因具摺
送直隸巡撫李維鈞會奏維鈞匿之冀堯奏紋巧
取此項三年二月紋據實陳明

諭曰伊等蓄意如此爾若根基不牢則已墮其術中矣前
項既經伊等送到粵西朕又了然明白可卽留充
公用旋授直隸總督四年三月抵任十月奏請增
直隸河員天津州同青縣子牙河主簿各一員隸
天津道轄又請將河閒天津所屬旗民案件改歸
新設之天津理事同知轄部議如所請十一月奏
言在京部科及直隸藩臬等衙門向有積年書吏

盤據招搖役滿僱人承辦仍陰主其事謂之缺主
臣嚴查逐令出境並飭各州縣毋許容留一人但
訪得部科缺主尙有潛居通涿昌平等處者請

敕部科諸臣查開姓名移咨一併驅逐得

旨俞允尋補工部右侍郎

名臣傳參
先正事略

唐執玉江南武進人康熙四十二年進士雍正七
年以都察院左都御史署直隸總督時執玉方抱
病力疾視事八年十二月奏天津直隸州係水路
通衢鹽漕聚泊旗民混淆一切巡查防捕及承辦
水師營各項軍功差繁事尤請陞州爲府附郭置

天津縣專理地方事務再寶坻縣廣有六百餘里其毘連之梁城所距邑甚遠一切公務不能兼顧請將寶坻縣南路一帶割歸梁城並改所爲縣從之尋定天津陞府曰天津梁城所新改縣曰甯河旋以病解任十一年正月復署直隸總督三月卒

於官

同上

劉於義字喻旃江南武進人康熙五十一年進士雍正九年以刑部尙書署直隸總督

同上

乞貸饑民

坐盜論死者百餘人並奏除直隸爲盜不分首從

皆斬之令

紫竹山房文集

乾隆九年協辦大學士事五月

御史柴潮生請修直隸水利

上以於義諳習情形令同總督高斌辦理十二月奏陳水利事宜一錢糧令清河天津二道核轉一事關通省陸續報銷以清案牘一工程三萬兩以上委專員分辦各自報銷以下委員同地方官辦由地方官報銷一河渠隄埝橋閘有關要工應專員典守者於通省員弁內奏移一築隄開河聞佔熟地旗地就近撥補民地給價除糧一工料價用市平給發又奏勘初次應舉各工一瀋宛平良鄉涿州境內牝牛正支各河一開新城雄縣境內白溝河支

流趙北口淀內各支河一開東淀河道徑直以暢
尾閘一月疏子牙河口閘築隄分清渾一疏舊減
河入鳳河消滙水一掘場河淀淤塞利宣洩一引
唐河由舊渠歸保定河一以渠閘引河淀沃田一
濬正定縣各泉爲渠成自然之利一修復營田舊
渠閘一給百姓營田工本均下部議從之十年署
直隸總督奏勘三次應舉各工均議行又奏慶雲
鹽山二縣請於本年節省項下酌給銀兩砌輒井
并多開土井資灌漑再撥用商捐貯銀委員赴張
家口買牛給貧民耕種並度土性買栽棗杏桃柳

三萬株以備食用從之尋疏請減慶雲縣額賦得旨著將該縣每年額徵地丁銀蠲免十分之三永爲例七

月署直隸河道總督十二年四月直隸水利工竣

議敘加三級尋回京卒諡文恪

名臣傳

李衛江蘇銅山人雍正十年授直隸總督十月節制直隸提督等官十一年九月疏言直隸地方遼闊州縣事繁佐雜官應酌量增改下部議行十二年正月條奏運河事宜因直隸山東運河交界各州縣犬牙相錯遇命盜案件互相推諉請定地界撥換以專責成乾隆元年四月兼管直隸總河三

年四月奏言滄州青縣挑濬甌河佔用旗民地畝其糧銀應請造冊開除並照濬武清縣筐兒港壓佔地畝之例按畝給價部議從之十月卒

賜祭葬如例諡敏達五年祀直隸名宦並入祀賢良祠名臣傳

孫嘉淦字錫公山西興縣人康熙五十二年進士乾隆三年以吏部尙書出督直隸四年三月以直隸河工緊要

命偕總河顧琮悉心辦理嘉淦疏言天津地方南北運河與淀河交會西沽而入於海河臣觀南運河水甚

濁與永定河相似一入海河水皆濁流經久必淤
墊況通省之水會於一線之海河秋潦時至勢必
宣洩不及大學士鄂爾泰前曾奏准於靜海縣獨
流地方開引河實下游治水之關鍵但開河易達
海難設中途梗阻則漫溢爲患且海口開深又恐
潮水倒灌臣等現委員勘通省水道凡眾河交會
及入淀入海之路有急宜修濬者卽於今夏興修
皆得請後諡文定

同上

史貽直字儼弦江南溧陽縣人康熙三十九年進
士乾隆七年以吏部尙書署直隸總督直省旗民

維處號稱難治莅任半載題結事九千六百餘又
念永定河工爲京畿第一要務八年正月偕清河
道知府由固安沿河相度情形添築滾壩凡修防
疏濬之宜詳勘熟籌奏明辦理人咸賴之

行述

高斌滿洲鑲黃旗人乾隆四年任直隸總督兼管
總河印務奏籌永定河全河機宜惟在使尾閭通
暢七年四月請拓天津水師營汛增駐滿兵一千
合舊額爲三千滄州亦增兵二百合舊額爲五百
均從之十二月奏言永定河上游爲桑乾河北岸
自山西大同縣屬之西堰頭村起至直隸西甯縣

屬之辛其村止南岸自大同縣屬之冊田村起至西甯縣屬之揣骨曠止可各開渠灌田桑乾河由西甯石閘村入山經宣化縣之黑龍灣懷來縣之和合堡宛平縣之沿河口兩山夾峙一線中趨若於山口取巨石錯落堆疊仿竹絡壩之意作爲玲瓏水壩以殺洶湧之勢則下游之患可減疏上議行十年加太子太保二十一年卒

賜祭葬諡文定

名臣傳

方觀承字宜田安徽桐城監生乾隆十四年官直隸總督兼理河道留心水利濬治改移十八年奏

設義倉告成計倉千餘酌定條規繪圖刊行二十
年署陝甘總督二十一年同任三十年四月條舉
木棉事十六則繪圖具說以進三十三年卒謚敏
恪自爲清河道至總督皆掌治河洞徹地勢相時
決機前後數十疏從之輒利四十二年祀名宦

先正

事署藩司任內親歷查勘多方拯救民困以蘇

慶雲縣志

周元理浙江仁和人乾隆三年舉人三十六年官
直隸總督三十七年正月疏劾三座塔監督長春
私設稅局鞠實論罪如律三月疏言直隸雨多河
漲通京一帶衝衢疊道日漸衝刷溝渠淤阻漫淹

民埵在在衝決田廬均受其患應照以工代賑之
例覈實估修時尙書裘曰修閱直隸河工與元理
協議旋合疏言直隸諸水情形酌量修濬得請嗣
因案革職留任十二月補授都察院左副都御史
暫署直隸總督印務四十五年擢工部尙書四十
七年卒於家

大臣
列傳

楊景素字樸園江南甘泉縣人乾隆三十六年官
直隸布政使三十九年十月以軍功陞山東巡撫
四十三年調直隸總督時值永定河伏汎景素奏
展北三工河身四百丈與上下流等水得宣洩而

險工搶修之費省又奏成安少莊壩決口河身實
深於故道請卽順水勢濬治加隄工省而河甯旋
卒於任

新通志

鄭大進字退谷廣東揭陽人乾隆元年進士四十
六年官直隸總督宣力彌勤十月卒

賜祭葬如例諡謹恪

廣東通志

劉戔字先資山東單縣貢生乾隆二十三年授曲
陽縣知縣四十三年補授直隸天津道調補通永
道四十四年冬署直隸按察使四十八年授直隸
總督兼兵部尙書銜會同鹽政奏請於湖南湖北

江西等省製造剝船一千五百隻分給沿河州縣酌定章程以備北運河剝漕之用得請人皆稱便五十一年春正月京察奉

旨交部議敘後陞授兵部尙書卒諡恪簡

新通志

梁肯堂浙江錢塘人乾隆二十一年舉人五十五年官直隸總督五月奏添建海河閘座旋因案革職留任嘉慶元年正月與千叟宴二年八月奏永定河漫口堵築合龍又黑龍江兵丁全出境得

旨嘉獎尋授刑部尙書

大臣列傳

胡季堂字升夫河南光山人嘉慶三年授直隸總

督四年奏殲斃長新店首盜張標係內黃令陶象炳之力

諭嘉其據實陳奏不存邀功之念又續獲長新店盜夥并

滄州逸盜韓四等

先正事略十月卒諡莊敏

名臣傳

顏檢字惺甫廣東連平州人乾隆四十二年拔貢嘉慶五年護直隸總督七年補授九年二月

京察下部議敘尋以事革職發往烏魯木齊効力贖罪道光二年正月復擢直隸總督先是直隸藩司屠之申奏直隸差務殷繁議請於每地畝攤徵銀一分以均徭役

上命俟顏檢到任後妥議具奏尋奏稱減差均役之說實不可行其略曰自古有治人無治法立政貴持大體無事紛更守土重在得人自臻治理現惟有嚴飭該管道府各就地方情形並向來辦理舊制隨時斟酌妥爲布置一有差務卽嚴察該州縣等如有能體恤民艱公平允協之員據實保舉其有聽信書役任意浮派苛累者立即指名糾參不得稍從寬縱得請定爲例

大臣列傳

熊枚字存甫江西鉛山人乾隆三十六年進士嘉慶六年六月直隸水災總督姜晟以報災延緩逮

問枚署總督事歷查九十餘州縣被水輕重情形
奏請撥銀急賑尋同侍郎那彥寶等籌辦永定河
工堵築事宜新任總督陳大文交替卽周歷直隸
辦賑八月赴東安訊僧人演亮控教諭查賑需索
又赴文安訊匿名揭帖控知縣減賑私徵均鞫誣
如議請清查賑戶不得拘每戶大口不過五小口
不過三之例下部議行九月擢都察院左都御史
枚巡閱數十州縣舉辦賑實心者五員劾辦理草
率者四員七年四月署直隸總督尋卽總督事赴
河間景州霸州等處查勘蝗蝻據實入奏十年六

月復署直隸總督同藩司裘行簡清查各屬虧項
尋補左都御史

陳大文河南杞縣人原籍浙江乾隆三十七年進
士嘉慶六年六月京師大雨永定河北岸決口成
災總督姜晟以奏報遲延逮問大文署理八月奏
辦大賑須提早一月以救災黎並條陳放賑章程
十月偕兵部侍郎那彥寶武備院卿巴凝阿會奏
永定河北岸上頭工合龍全河水勢復歸故道得
議敘後因病籲請來京供職

俱同上

吳熊光字望崑江南昭文人乾隆三十七年進士

嘉慶二年擢直隸布政使直省庫項繁多卽設局清查專延幕友於流水簿外另立清簿眉目了然書吏始無從影射迨後冒領錢糧之案發覺前後各任均爲朦混獨熊光任內以查察甚嚴絕無舞弊四年正月以和珅薊州墳塋規模僭越並侵佔民田并有無藏匿寄頓轉飭清河道馳赴該處履勘詳查隨查得所屬新城清苑等處租地二百六十餘頃質庫錢肆等十九座條析具奏三月擢河南巡撫再擢兩湖總督九年夏調署直隸旋調督

兩廣

述行

裘行簡字敬之江西新建人乾隆四十年舉人嘉慶八年由福建布政使調直隸先是天下大政事賑貸轉輸供億皆以州縣爲經由藪匯錢穀出入多未釐正行簡以爲非清帑無以塞僥倖滌煩苛遂一以清帑爲首務福建布政使冊目十有一行簡剔分子目千五百有奇支解者毫黍皆見吏不能欺得銀若干萬直隸民逋議分年帶徵官逋議分年罰繳又得若干萬於是兩行省積弊一清先正事略十年九月護理總督十月署總督十一月奏直隸初二兩次原虧銀兩將應行監追人員飭追旋

卽查明原任知州顧賓臣等五人虧缺銀數奏請
辦理十一年四月奏請移駐汎員以重河防補築
永定河隄埝工程又會籌兵丁差費於該省公項
內撥款生息嗣因案革職留任九月卒諡恭勤臣
列傳

邢彥成字韶九姓章佳氏滿洲正白旗人乾隆五
十四年進士嘉慶十八年授直隸總督十九年巡
歷開州條陳善後五事灤州石佛口王姓世習白
蓮教惑衆謀逆全獲誅之二十一年捐穀三千石
興復義倉貯穀十六萬六千石有奇尋以他事落

職遣戍起用道光五年十月復調直隸總督是年
江南運河阻滯南糧改歸海運十一月疏陳海運
漕糧撥運事宜下部議行六年五月以直隸竊匪
日多請嚴竊盜治罪之例從之七年七月以直隸
挂名吏役過多包差滋擾苦累閭閻裁汰二萬三
千餘人酌應留名數冊報嚴明得請並通諭直省
均照所奏章程辦理十三年卒諡文毅彥成性好
學遇有執持於權要無所屈勦辦川陝楚及滑縣
教匪尤有功任總督時三次考績皆優敘雖屢起

屢蹟中外想望風采

先正
事略

蔣攸鈺號礪堂漢軍鑲藍旗人乾隆四十九年進士道光三年授直隸總督莅任後水旱頻仍被災州縣共一百數十處攸鈺請蠲請賑全活數百萬八四年六月偕侍郎程含章會議全省水道大綱奏請發帑次第興辦五年奏定防守千里長隄善

後事宜授體仁閣大學士

新通志

屠之申字可如號舒齋湖北孝感縣人嘉慶末授大名道大名兵燹後人民離散之申捐設粥廠二十七所晝夜經畫民困以蘇道光元年由甘肅布政使調直隸

諭曰汝在甘肅辦事好故調此請疏濬冀州衡水等處瀦
潦以利民田因事革職復起爲清河道陞布政使
護理督篆未幾告歸

同上

松筠瑪拉特氏蒙古正藍旗人乾隆三十七年由
繙譯生員考補理藩院筆帖式道光二年署直隸
總督奏請整頓直隸各屬書院九年署熱河都統
授閱兵大臣四月復署直隸總督卒諡文清

大臣列傳

曾國藩字滌生湖南湘鄉人道光十八年進士同
治七年由兩江調督直隸疏陳直隸應辦事宜并
請酌調人才畧言練兵飭吏二端爲直隸最大之

政其次則治河亦屬要圖八年二月查明積澇大窪地畝應徵糧賦請分別豁減又先後二次查明屬員優劣開單具奏尋疏陳練軍事宜並籌定簡明章程九年八月調兩江總督十一年卒

贈太傅諡文正光緒元年祀直隸名宦

新通志

熊伯龍字次侯漢陽人順治己丑進士提督順天

學政絕苞苴崇實學正文體丹黃甲乙皆手自評

定士風爲之振起卒祀名宦

舊通志

吳國對字玉隨安徽全椒人順治戊戌進士累遷

侍讀督順天學政頒三訓以教士敦孝弟崇實學

正心術士風丕變

安徽通志

李應薦字柱山山東日照人康熙丙辰進士督順天學政絕苞苴嚴請託釐正文體振拔寒憊請置學田以資贍養增弟子員額以廣進取復引近諸生反覆開導以讀書爲文之法人爭嚮之歲滿復

留任三載

李文貞集

楊名時字賓實江南江陰人康熙辛未進士提督順天等處學政每接諸生必開誘以立志居敬致知力行之道不專文詞見官屬一依儀制不肯少假借保定守違成例不錄河間左衛童子試劾罷

之未基年士習丕變

湖海文傳

五十六年出爲直隸巡

道時尙沿明制直隸不設三司而以巡道主刑獄

兼驛傳政充事劇吏因緣爲姦蠹名時細大必親

無留獄無匿情僉曰百年中無與比也

方望銘集

吳襄字七雲江南青陽縣人雍正元年由翰林院

侍講提督順天學政莅任距鄉試僅一月襄先期

繕稿以待比受印立檄行試事始不誤四府拔貢

前學臣未及咨部部議持不便錄科襄曰卽不選

拔諸生庸不得與試耶仍以生員入闈視事四載

正文體敦實學以先正大家開導諸生腐陋爲之

一洗所至留心民瘼敬陳畿南水利請設勸農使

並得請

汪由敦撰
神道碑

趙大鯨浙江仁和人雍正二年進士乾隆八年由都察院左副都御史提督順天學政疏陳整飭士

習二條得請九年父憂歸

大臣
列傳

吳文鎔江蘇儀徵人嘉慶二十四年進士道光十四年由侍講學士提督順天學政先是順天生員考試遺才以在京肄業不及同籍起文准用同鄉官印結投考有一人出結數十張至百餘張者其中無違礙未能周知易啟書吏朦混之弊至是

文鎔先期示禁並限定一人出結不得踰二十名之數嗣因有結數逾限者查出四名本結官並未認識憑學署書吏輾轉覓求私相取用奏請將書吏交刑部究辦十六年選拔屆期疏言查選拔十二年一行爲掄才鉅典登進之階較捷易啟招搖撞騙之弊且直隸省考選拔向有卷費冊費各項陋規名目貧乏者甚至不能應考殊非選拔真才之道道光四年曾經前學臣毛式郇奏請禁革茲恐積久玩生臣衙門書吏家丁自應加意約束並出示申禁惟局門校閱時內外閒隔而鬼蜮之撞

騙書吏之需索聞見未周弊難盡絕應直隸督臣
通飭各府州縣及提調各員嚴密察防如有匪徒
在該地方招搖撞騙迅卽拏究並由督臣示諭各
屬應試拔貢生員各項陋規概行嚴禁如有需索
抑勒情事准該生等赴提調官衙門稟訴從重懲
辦得請咸豐三年總督湖廣陣亡諡文節上同

馬騰陞順治十五年任長蘆巡鹽御史惠廉公正
疏罷王秉乾任內倒追商竈甯餉邊布等項銀數
十萬兩至今歌戴之前志

余縉浙江諸暨人進士康熙九年以御史巡鹽著

有善政商民戴之同上

江繫字采伯湖廣漢陽拔貢康熙二十八年官長蘆巡鹽御史次年新增天津鹽引四千道繫奏照康熙十七年臺臣傅廷樞條議酌留七百道餘俱

裁革

天津縣志

莽鵠立字卓然滿洲鑲黃旗人雍正元年任長蘆鹽政清介勤敏嘗以加斤免課通融帶運展限奏銷借帑數事面奏俱得請商民交賴之雍正三年改衛爲州疏請以天津舊轄之寫遠屯民分隸各州縣而天津百里內村莊向屬武清靜海者俱改

歸天津又請重修天津城垣及環城一帶隄岸如
瞿黃口老君堂教軍場諸處夙稱衝要宜修築以
防水患俱得請又立救火會重修鹽法志善政良
法不可枚舉乾隆六年祀名宦

三保滿洲正黃旗人雍正十二年任長蘆鹽政諭
近海貧民年六十以上十五以下以及殘疾孤寡
者報明地方官給與鹽牌日准販鹽四十斤以資
餬口無告貧民賴以生活者甚衆

徵瑞字時若內務府正白旗人自乾隆四十八年
凡三任長蘆鹽政清廉慈惠裁革一切冗費歲歛

設法調恤之修隄堰散絮衣增書院膏火費每去任之日士民送者數十里路塞幾不能行

李如枚字怡菴漢軍人嘉慶閒任長蘆鹽政培養人材誼極優渥生童肄業書院者於常例膏獎外益以廉俸鼓舞振興文風蔚起後以事逮京士子

泣送之

俱同上

文謙咸豐初任長蘆鹽政粵匪犯天津與地方官集兵民迎擊獲勝光緒四年奉

旨予諡並准於天津地方建專祠

采訪冊

丁思孔字泰巖瀋陽人順治壬辰進士康熙八年

任直隸守道出納平準胥吏不能爲奸時東南用兵供億浩繁思孔躬自措辦不以擾民禮紳士恤行戶惠卒伍尤多善政擢江南按察使

舊通志

朱宏祚高唐州舉人康熙二十四年任直隸守道捐俸拯荒刊田單平鹽價舊有狐皮梨板累民力爲請免民德之祀名宦

同上

邵嗣堯字子昆山西猗氏人康熙庚戌進士十九年知柏鄉縣爲忌者所中落職旋以薦授清苑縣屢斷疑獄循績亦如治柏鄉

山西通志

康熙三十年陞

守道清介持躬苞苴杜絕遇事霆發機激勢要憚

之擢江南學使卒於官祀名宦

舊通志

王謩字孝徵江蘇太倉人康熙四十五年進士雍正七年官直隸布政使時州縣新舊交代惟倉穀爲難或前官預儲醜穀或後官延宕不收互詳聚訟謩稔其弊使碾米代交以一米抵兩穀糶之平糶後以價貯庫秋成時新任買補有司便焉兵餉舊例於次月初始領前月糧謩令於前月望後發

次月之糧營弁頌爲善政

春融堂集

沈起元字子大江蘇太倉州人康熙六十年進士乾隆七年官直隸布政使八年直隸旱總督議以

十一月開賑起元力爭得速賑所屬有稟賑戶不賑口者嚴斥之災民俱得實惠又絕鹽綱之例餽卻庫封之羨餘省州縣解項之苛駁寬盜案三月之率結聲名益振

同上

吳士功河南光州人雍正十一年進士由吏部主事荐陞直隸大名道遷直隸布政使奏藩庫錢銀交代新任接收出結督撫盤查保題定例綦嚴但日久視爲具文請嗣後撫藩離任之日卽將在任庫項會否挪借有無虧空之處另摺附奏其或在任不久調補遠省資斧不足欲借庫項者一併據

實陳奏新任撫藩接印後亦於交代限內月摺奏明仍照例出結保題則挪借之積弊可除遂定爲

例

名臣傳

陸費瑯浙江桐鄉縣人附監生嘉慶十三年順天鄉試副貢充謄錄議敘知縣二十年選授湖北麻城縣嗣丁父憂服闋揀發直隸補棗強縣調清苑游陞易州正定府大順廣道臬司擢廣西藩司道光二十年調直隸藩司後擢湖南巡撫於二十九年丁母憂回籍咸豐七年卒於家年七十四歲瑯自牧令起家所至有聲馴致封疆具見

重修天津府志

卷四十

宦績

三

光緒八年

國史本傳任直藩時因粵督林則徐條奏請於直隸開墾水田以抵南漕親至天津查辦勘定天津縣所屬之新城葛沽鹹水沽附近海河可種之地令民認墾納糧永爲民業一切章程悉心經畫百姓蒙利其父元鏞先爲天津知縣有惠政至是遂有大小青天之頌是年天津等處水災立即籌款派員分赴各屬趕辦賑濟並倡捐廉俸函致各處紳士集捐設廠施送棉衣采買雜糧接濟平糶次年復加賑各屬借給農民籽種並勸典當免收農具利息活民數十萬光緒二年天津縣人沈兆瀾等

呈請從祀名宦九月十五日奉

旨允行

檔案 案纂新通志時距是甫數年竟不查取立傳疏漏至此然每有尤甚者此尙不爲異也

裴宗錫字午橋山西曲沃人乾隆間由山東督糧道調霸昌道旋擢直隸按察使庭無留獄嘗曰淹滯囹圄亦傷民命不必皆刀鋸也凡治獄虛衷推鞠務在得情時宗錫治刑書與總督方觀承時有所齟齬執持侃侃必如所擬然後已觀承益重之母憂歸尋起原官

章學誠撰傳

韓文綺浙江仁和人乾隆六十年進士嘉慶十七年授直隸永平府知府十九年陞清河道二十年

查拏灤州教匪王殿魁等文綺首先獲犯二十一

年署按察使

大臣
列傳

吳廷棟字彥甫安徽霍山人道光乙酉拔貢咸豐二年六月由刑部郎中出知河間府粵寇北竄團練守禦甚固癸丑冬陞永定河道甲寅春署天津河間河務兵備道七月擢直隸按察使總督以河間爲京師門戶廷棟防守嚴密且得民奏留之乙卯軍務平赴按察使任六年冬授山東布政使七年入京時

廷議行當十錢官民苦之總督不敢言廷棟因

上問反覆開陳並及鐵錢鈔票之弊議遂寢尋降調直隸

按察使後官至刑部右侍郎卒祀名宦

年譜

丁壽昌安徽合肥人同治初屢著戰功八年直督
曾國藩調壽昌贊軍務九年天津民教滋事署天
津道措置裕如在任五年勤政愛民始終如一丁
憂去光緒三年服闋總理海防營務值直境旱荒
壽昌會督官紳集捐助賑全活飢黎無算四年署
津海關道旋晉按察使清理積案千餘起壽昌秉
性忠誠居官廉潔未幾積勞卒奉

旨准建專祠

采訪冊

秦鉞江南無錫人順治十二年進士康熙十五年
任長蘆鹽運使長蘆鹽政大壞私販日滋諸商習
爲豪奢運使亦藉商人爲囊橐鉞奉職據法一無
所撓於是始凜然聽命戶部議增引日鉞致書當
事以竭澤焚林爲喻覽者歎服

堯峰
文鈔

任璣字公義陝西涇陽人順治辛丑進士康熙二
十五年官長蘆運使建議引鹽積滯必通銷於引
鹽不至之地其產鹽州縣例不食官鹽者奸商坐
引至數千計悉請罷於是商力漸蘇鹽課無損遷
直隸守道以良鄉旗民經界未正冒暑勘驗積勞

得疾歸卒

陝西通志

靳襄漢軍鑲黃旗人康熙三十六年任長蘆運使於育黎堂後倡立骨塔覓苦行僧人尋訪無主屍骸成具者葬之義地零散者納於塔中日久充滿則掩埋之復置田爲僧人餽粥等費以垂永久

天津

縣志

蔣林字元楚全州人康熙五十四年進士乾隆元年由浙江嚴州府除長蘆運使洗手奉公廉隅凜凜商故有公使錢當時院司歲各費數萬緡林以身率儉歲費不及百緡院亦憚林歲取幾減前數

之半嘗再護院事得關徵羨餘數千吏白故事當歸私橐林命留之庫不私一錢居四年以父母老請歸養

上覽奏顧謂近臣曰世乃有不願久爲長蘆運使者耶籍

其名始俞其請

湖海文傳

倪象愷四川威遠舉人乾隆五年任長蘆運使雅好斯文立玉成文社招集諸生按期試藝丹黃甲

乙手口忘瘁士子經指授者爲文悉有程法

天津縣志

盧見曾字抱孫山東德州進士乾隆十六年任長蘆運使剏立問津書院日集諸生課之邑舊有施

棺會事將中輟諭蘆商於公費項內每年撥助銀兩定爲例民悉稱便

董承勳浙江烏程人副榜乾隆十六年任天津道時鹺商有立天津鹽店之議公諭以天津產鹽之區拾鹽可食不應置店及陞任運司終不准鹺商自請上憲竟立店公不爲行文人皆偉之聘名進士吳聯珠主講問津書院每課士公必同席講貫文風蒸蒸日上登賢書捷南宮者接踵焉

陳樹蓍字學田湖南湘潭人廕生乾隆二十七年任長蘆運使誠樸廉潔不受鹺商餽贈而事有利

於商民者無不悉力爲之俱同上

嵇承志江蘇無錫舉人乾隆五十六年官長蘆鹽運使五十九年天津馬家口海河漫溢同長蘆鹽政徵瑞晝夜搶護培隄堅固又北倉河水陡漲同倉場侍郎景安竭力搶護捐貲復築土埵大臣列傳

孫泳字介梅江蘇陽湖人乾隆四十四年任天津知府性廉介奉檄署長蘆運司鹺商以千金爲鋪墊費力卻之及丁母憂同官以百金贈復固辭同官曰爲先靈冥資也乃盡以其金買紙焚之自奉儉約食無兼味重修三取書院加生童膏獎一如

問津士人德之

天津縣志

黃世發貴州舉人康熙五十年任肅甯縣知縣惠愛在民輿情感戴歷陞營田觀察使巡歷勸導善於其職後以病卒官囊橐蕭然不能歸櫬兼有肅甯任內積欠未完雍正九年六月奉

特旨褒卹

將所欠豁免令督撫俛助俾得扶櫬而歸

據前志補

徐永順遼東人順治六年官天津道時議勦洗靜

海諸邑永順力保天津無賊民賴以全

舊通志

薛柱斗延長縣拔貢康熙九年爲天津道勤政惠民禮士崇學津門爲兵民錯處奸宄雜沓之所柱

斗綏靖得宜境內帖服至葺道署修黌宮悉捐俸
爲之人尤服其廉云

同上

石天樞陝西富平舉人康熙二十五年任天津道
署中所需向取諸市天樞列榜以示屬吏無敢濫
取者距城三里有隄百丈時潰決爲患天樞倡築
完固水患以平鄰境貧民覓食於津者歲數千計
勸育黎堂收養之士民建生祠以祀

天津縣志

朱士傑字直莽漢軍廕生康熙二十八年任天津
道先是石天樞勸育黎堂日久恐其廢墜以公羨
請於大吏並倡捐二千金置田立租人咸稱之

同上

陳宏謀字汝咨廣西臨桂人雍正元年進士乾隆

元年官天津道河閒滄景諸州最窪下恃隄防爲

衛宏謀相其夷險築遙隄月隄縷隄彭啟豐撰墓誌銘培遠

堂集南運河修防條議議得南運一河自全漳濟運以來一派渾流洶湧奔赴直隸境內雖免阻淺之虞時有漫決之患其漫決者皆係頂冲掃灣之處其泛溢者皆係河灘無隄之處是以歷來凡頂冲掃灣皆爲險工年年加高培厚俱動正項名曰官隄而所加培者猶難十分堅厚臨河之舊土日被冲刷則新幫之土益難抵禦因有建築草壩鑲砌草工之事草工易腐朽三年保固限滿卽須加鑲修拆是以沿河草壩日多帑費日繁而工之險者仍險此有隄之患也至於河灘無隄之處或河岸寬闊或河灣淤嘴旣無畏於頂冲復不常有泛溢偶遇暴漲小民於水到之處築隄攜禦名曰民埝而此一縷民埝臨時攢築不察形勢不加夯礮汛後隨卽坍塌在水小之年似可不需此埝若遇

大水一片汪洋在在危險此又無隄之患也自乾隆二年蒙河臺奏請建築高寬月隄放淤栽柳經鄂大學士議覆准行之後節年以來已將舊有之月隄加幫寬厚放淤成工極薄之隄變爲寬厚化險爲平已有成效就此類推凡屬有隄頂冲掃灣之處舊有月隄者均宜月建月隄以備將來放淤至於無隄之處均宜就其高阜土脊月建遙隄以爲外衛大抵地勢高阜者宜建遙隄而不宜建月隄若建月隄於高阜之地旣不能放淤徒爲積水所浸儻縷隄有傷水入月隄勢更湍急斷非月隄所能抵禦也地勢窪下者則又宜建月隄而不宜建遙隄若建遙隄於窪下之地不但水至建瓴而下難以抵禦且使遙隄之內縷隄之外可耕之地常爲積水深坑末由宣洩無益於河有損於民此月隄遙隄義固各有所取而地亦各有所宜也自來之議月隄者皆爲放淤涉險甯可臨汛堵禦議遙隄者則謂築隄於水所罕到之地原覺過計殊不知凡頂冲掃灣之處縷隄單薄若不放淤日益汕刷舊土漸坍新土難固爲費日多一日危險日甚一日豈可苟延且

皇恩覃

夕不爲遠計且放淤之法不始今日現在兩岸淤平之月隄不可勝數其他凡屬險工大半築有月隄前人爲此無非爲放淤而設自當因其涉險益加慎重一勞永逸以期萬全不宜因噎廢食坐致危險也至河灘寬岸水勢雖云罕到然歷考近年水勢漸大乾隆二年之水大於常年之水而三年之水則又大於二年矣上年河水業已出槽平時所謂極平之工河灘之岸皆已過水官弁土民晝夜堵禦惶惶急遽幸蒙底水勢漸退獲保安瀾儻再長數寸之水隨處皆可泛溢兵夫民力豈能防禦考之河防一覽所載觀水之法凡凌汛長水一寸秋汛長水一尺捷地興濟兩減河自建開以來凌汛從未過水今歲凌汛兩開口過水四五寸不等就此而論焉知今年之水不更大於上年況河防重務有關運道民生惟宜盡未雨之綢繆豈可徵天幸於萬一然則築月隄以放淤似險而實平築遙隄以外復乘小車衛似迂而實切誠經理運河之要務也

咨訪水利得放淤之法凡汎水盛漲多挾沙而行

導之從隄左入隄右出如是者數四沙沈土高隄

內悉成沃壤喜曰老河兵真吾師也

先正事畧

又查義

學查賑飭議育黎堂規條請修天津海河疊道

培遠

堂集尋遷江南按察使官至東閣大學士以疾歸卒

諡文恭

先正事畧

陶正中字田見江蘇無錫進士乾隆七年任天津

道津邑爲漳滹下流時患水正中建言疏子牙河

濬淀泊卽藉其土以築隄議最偉大吏首薦之擢

直隸臬司復留以襄賑立以工代賑之法人尤德

之

天津縣志

王師字貞甫山西臨汾縣人雍正庚戌進士十一年知元城縣調清苑縣皆有聲乾隆七年遷知正定府八年分巡清河道九年隨大學士高斌吏部尙書劉於義句當直隸水利周歷保定河閒天津正定等處所擘畫事宜多被採用十年遷直隸按

察使

陳兆崙紫竹山房集

宋宗元字愨庭江蘇元和人舉人乾隆二十三年再任天津道三十六年運河漲溢城西芥園隄潰汎濫南鄉復逆行圍城公聞與人言城東南中堂窪有土埳掘之則水可洩於海乃遣營弁孫成玉

夜往掘堊而水遽消退因詳請直督自芥園挑挖
減水河一道由中堂窪達海可永洩渾淀子牙各
河穿運之漲且環抱城南天津得資地利更請分
挑岔河至鹽山則商賈往來販運甚便而津南亦
爲勝地事未果行迨嘉慶六年水入南鄉無入海
路逆行圍城論者深慨公議之不用云

天津縣志
案新通

志宦績無此而有葉信且傳與此事蹟相似再三
審覈始知縣志此傳之上係遊擊葉信不解新通
志何以合兩爲一且去宋姓名而以葉信爲天津
道也至其職官則又以葉信墓去陳輝祖致成離
奇不可究詰誠恐疑誤
後人故不得不表出之

喬人傑山西徐溝人舉人乾隆五十五年任天津

道歲壬子津郡大水鄰邑飢民奔奉天路過津邑者日以千計公倡率官紳捐資立粥廠於四門外以飼飢者

同上

沈長春字芝亭歸安人乾隆乙亥舉人知鉅鹿縣嘉慶五年調天津明年六月霖雨浹旬永定河水異漲天津濱海城卑羣流匯注閉城堵禦城不浸者三版晝夜巡視城以無虞城外皆巨浸民多漂溺長春立城上指揮募救一人予錢千自朝至暮絕城上者不下千人又於隙地蓋蓆棚人給麪簞凡數月全活者無算督部鹽使皆以入告題大名

同知署大名府事十年十月補通永道十二年調天津道是職尤重漕務告大吏議經費定限歸甫三日南糧已入境長春往來河干測水深淺竭力督催雖暑熱未嘗稍息漕得無誤抵滄州已擢河南按察使旋得加按察使銜仍回天津道任之

旨未幾授湖南按察使

亦有生齋集

李鑾宣字石農山西靜樂人進士嘉慶十六年任天津道敬禮文士與邑處士趙雪蘿締交常屏騶從叩門造訪清談竟夕風概可想厯官至雲南巡

撫

天津縣志

張起鵬字子班甘肅古浪人由同知游陞天津道
政清刑簡吏畏民懷有土豪某者恃財強橫出入
公門人畏其勢莫敢誰何公訪得其不法事拘而
鞫之某服罪徑詳大吏置之法輿論翕然稱快咸
豐三年秋粵逆北犯與鹽政文謙運使楊需力籌
戰守五年擢順天府尹旋以在天津道任時督辦
糧臺因公被劾交部事未雪而卒津人士惜之子
桐熙道光己酉副榜任廣西柳州府知府

同上

王奐江南南陵人河閒知府念慶邑荒瘠檄催獨

緩遇有災傷力請蠲恤民賴蘇息

慶雲縣志

徐可先武進進士康熙十五年知河間府時值三藩叛亂兵馬南征甫蒞任卽備治軍旅使命往來之役歲荒議賑施錢米棉衣無算陞山東提學副使

河間府志

張璨字豈石湖南舉人雍正二年任河間知府值水災亟請上官賑卹弗聽尋晉副使銜赴陝西籌辦軍需未行改長蘆鹽運使入謝繪災民圖以進

上爲動色時方議興營田水利晉按察使銜督辦工程

湖南

通志

李梅賓廣西臨桂人進士雍正九年任天津知府

時始置郡所屬七邑皆瀕海之地素稱難治公下車之日首查糧冊以杜侵漁次立規條與民更始有訟者理喻情格無不悅服而去性慈祥鞭扑不試而察吏特嚴更有舞文者公怒欲笞之既而曰吏受官笞無足恥然受某笞則不可復爲人矣遂釋之吏皆感泣終其任無敢爲非者每朔望集諸生於明倫堂宣講畢卽討論經史士習蒸蒸日上春秋兩闈獲售者一時稱盛爲治不尙粉飾惟以興廢爲急如建考棚修文武廟設城東南隅闢築府署後樓刊郡邑志製僉生舞衣皆公傾囊之費

也儉於自奉自州牧至監司惟一子一僕自隨官民饋遺一無所受百姓獻額曰清慎勤僉呼爲李

佛旋擢山東運使

天津縣志

劉君成字生餘貴州貴筑監生乾隆五年任天津知府未蒞任微服至城溷迹市廛數日廉知匪棍姓名牌示於眾首匪曹某畏威悔過遽改行餘俱斂跡又禁釀酒以重民穀

胡文柏字友仁山東海陽人貢生乾隆八年任天津知府廉明正直益民之政無不舉行每歲冬臘兩月令當商減息三分減作二分二分減作分半

貧民悉沾其惠聽訟明決如神自書情理法三字額於堂以自儆復額其內堂曰問心堂蓋每事必矢於神明也去任之日邑民爲之罷市洊擢安徽巡撫

熊繹祖字定思湖北京山拔貢乾隆十五年知天津府偶見城西白骨暴露心惻然乃捐廉倡率邑紳立天澤會置義地建骨塔復置靜邑陳官屯地十九頃二十七畝取租爲經費以垂永久

靈毓滿洲鑲黃旗人乾隆二十三年任天津知府慈祥愷惻每聽訟令原告人呼被告者至情恕理

遣立判而去事無巨細不經吏役手商賈貨物被
吏役侵漁者必代昂其值追償之有園夫訟某役
以賤價封其園毓親率園夫往索倍其價而去其
封次年以

特召去任士民泣送城市擁塞不得行凡二日始出境

金文瀄字質夫浙江錢塘人進士乾隆二十八年
任天津知府崇尚文士惠政甚多罷官後主講問
津書院課生童如子弟凡所識拔者無不騰達云
俱同上

黃立隆字定之湖南甯鄉人乾隆癸酉拔貢官河

閒同知隨嚮導大臣查灤濡二水源繪圖說進呈

擢大名知府護本道事後調知天津府值歲旱辦

賑不冒不遺全活飢民無算以勞疾告歸卒

湖南通志

李紹元浙江仁和人乾隆五十年任天津知府絕

苞苴杜請託西門汎卒王三夜殺人上官請勿深

問不聽卒置之法邑向有天澤會義田歲收租爲

掩骼費會河南歲歉飢民多流離至津卽取存租

恤之全活甚眾

天津縣志

興安滿洲鑲白旗人監生乾隆五十二年任天津

知府清廉正直不受陋規僉曰此向例也公曰他

人向例吾不向例卒不受自奉儉約食無二味城西有小店棲乞兒每嚴冬風雪不能出門死者相繼公取天澤會存租恤之全活甚眾

同上

恆春字宜亭滿洲正白旗進士道光十八年任天津知府開城池葺鐘樓修學棚平衢路復捐資立惜字社輸五百緡作瘞骨資以廉能稱陞永定河

道游陞雲貴總督

新通志

錢忻和字香士雲南昆明縣人咸豐三年知天津府九月閒粵匪橫犯津郡忻和躬冒矢石固守濠牆後卒附祀長蘆鹽政文謙專祠

同上

石贊清字襄臣貴州貴筑進士咸豐六年知天津府潔己愛下深得民心咸豐八年英吉利到天津制軍某走贊清聚水二甕於堂階曰夷如入脅則與吾妻死此矣未幾相國桂良與議和而去十年英吉利佛郎西入天津總督以下多受辱夷分住官舍惟贊清毅然不屈夷令其去曰取吾頭以往官舍不可讓也夷異之一日夷以五百人持兵入署扶贊清坐肩輿導入夷館曰非敢相難聞有兵欲燒吾船故假君爲質耳贊清不食後數日民情洶洶夷人恐命之去贊清不可曰吾如何來當如

何歸也夷復命五百人前導以肩輿送之歸常首
出一指稱之曰此好官也夷居天津數月贊清終
不離衙署迄夷人入京師取和歸贊清皆不與聞
方宗誠撰記事十一年冬擢順天府尹有以資觀感之

諭去任紳民泣送數十里官至工部侍郎

天津縣志

同治九年

祀名宦

采訪冊

高必大湖廣襄陽籍廣甯人貢生康熙九年任清
軍同知政清刑簡愛士惠民捐俸修學茂績丕著
前志

顧高嘉字南樓浙江嘉興進士康熙十四年任河

防同知公正和平力懲情弊建奎宿樓開濠設閘

以通水利己未旱蝗倡捐千金立粥廠賑飢全活

無算去任後士民立碑誌德

天津縣志

凌燾字約銘安徽定遠人康熙癸巳舉人以御史

巡察直隸等處平反冤獄天津漏報水災親勘得

賑

安徽通志
以下天津縣

張可立長蘆鹽運司經歷清廉律己著有政聲從

祀名宦

縣志

錢蔭南江蘇太倉人監生乾隆四十二年任長蘆

鹽經歷樂善好施詳請運司於城西購立義地聽

民埋葬

孟淦山西太谷人乾隆四十四年任天津分司鹽關浮橋係其祖衍周所設遇閑橋之時另有巨艦渡人歲久弊生橋夫廢巨艦而用小舟每渡人必盈百按人索錢舟小人眾動遭覆溺淦訪知重責橋夫盡撤小舟仍用巨艦焉

平聖垣字翊山浙江山陰舉人嘉慶六年任小直沽批驗大使天津鹽關向設浮橋以便往來值運鹽開橋則令橋夫以巨艦渡人例給工食後橋夫漁利廢巨艦而用小舟每渡按人索錢無則詬辱

之舟小人眾時有覆溺之虞至兩岸搭板與日暮
閉橋輒故留其隙車陷則闕起抬架以索重酬公
蒞任密訪得實立拘橋夫重懲之盡撤小舟仍用
巨艦日坐河干恆以乾餱代饗飧暑遠於橋移而
近之或不待肩輿而行從此人不病涉云

徐而發湖廣蒲圻人監生雍正九年任天津知縣
時天津甫由州改縣公興利除弊深愜輿情眾獻
額曰忠孝廉潔

張志奇字鴻如山東利津人進士乾隆元年五年
兩任天津知縣誠樸正直百姓感之去任之日爲

之罷市

朱奎揚字南湖浙江山陰監生乾隆二年任天津知縣精於折獄疑案皆立剖有啞者婦私於人指其夫爲訛賴夫不能自陳奎揚投果於婦之幼子令分給其父而果給啞者遂仍以婦歸之去任時百姓送者塞路

熊恩紱廣西永康人乾隆三十一年任天津知縣偶見河上浮尸因於鹽關海神廟設局備棺木諭沿河居民一遇浮尸卽時撈報給棺外以錢五百爲瘞埋之用仍詳記年貌衣履以憑認領又白運

司紀虛中撥庫存羨餘以裕局費

俱同上

彭良騫字晉生江西南昌人乾隆甲戌進士三十五年知鹽山縣邑故多盜下車獲巨慙劉老托莽牛等數人置諸法盜相戒勿過境山東人呂虎傷於路不能言良騫察其情狀密捕一人至一鞠而服遠近稱神君邑地丁向責富戶催納名曰單頭富戶畏比代完往往被累蕩家產良騫立滾單法士民便之調天津縣濱海產鹽私販充斥良騫梟其渠餘弗聞上官以爲言曰民窮則爲盜絕其生是迫之爲盜也上官然之復修築隄埝以禦風潮

巨浸之區悉成樂土積勞卒於官

南昌縣志案此非但兩縣不

祀名宦且後修邑志均無一字及之新通志爲此等博采鄙見殊未能信說見後靜海法憲吳貽誠下

申允恭河南延津進士乾隆四十五年任天津知

縣廉明慈惠輿情愛戴官至山西雁平道

縣志

李符清字海門廣東合浦舉人乾隆五十五年任

天津知縣重文學能制強悍

陳鳳翔江西崇仁監生嘉慶二年任天津知縣重

士愛民不畏疆禦官至江南河道總督

吳之勳山東海豐舉人嘉慶六年以天津同知攝

縣事六月運河盛漲城西芥園隄垂潰公於風雨中督眾搶護水及趾不爲動城賴保全官至湖北荆襄鄭道俱同上

陸費元鑽浙江桐鄉縣人原任禮部左侍郎陸費墀之子由監生於嘉慶二年山東河工保舉縣丞補直隸正定縣管河縣丞陞東光縣知縣調天津縣嘉慶二十四年卒於子琰湖北麻城縣任所當十年任天津縣時大疫流行遠近數百里遍染猝不及救人情驚惶元鑽首先倡捐在城鄉廣爲設

局延醫購藥親自周歷巡視救民數萬勸耕稼督

課維勤時邑尙多荒蕪極力招徠捐備農具籽種
得新墾膏腴八百餘頃三年後

國課有增禁錢糧私派規費增膏獎以育人才聽訟
精詳必得其情豪悍斂迹舊習漸除光緒二年縣
人沈兆澐等呈請入祀名宦九月十五日奉

旨允行

檔案案膺俎豆而無傳者必秉筆故刪確見
不孚也此在續縣志時雖未舉行但沈固與志

事者顧不先立傳逾時始出而呈請前後不應易
滋疑議非止新通志因而漏畧也故爲補傳並聲
明之

周栻字未庵浙江諸暨進士道光十二年任天津
知縣清正廉明豪猾斂跡民獻堂額曰兩月而治

旋擢玉田以失察教匪去職咸豐十年粵匪陷諸
暨殉難奉

旨賜卹建祠

縣志案此未盡實蓋王田事白後自請就
教改官嘉興教授久之歸老而粵寇至雖龍

鍾猶倔強不屈寇以衣被厚壓之死其裔迄無
請襲難廢者世德尤足勵薄俗也今占籍嘉興

王大猷湖南石門舉人道光十七年由獻縣知縣

調任天津公正勤明案無留牘長於聽斷兩造無

不悅服獻縣民爭訟未決者來津求判公卻之快

快而去擢通州知州未任歸

沈兆雲
撰傳

毛永柏字素存奉天甯海人道光二十四年任天

津知縣有惠政津邑風氣往往不置墜地而寄柩

寺院或浮屠於野久之摧殘暴露蓋纍纍皆是也
公於莅任之先奉差來津深爲惻然及下車卽捐
廉立義地隨諭各廟宇覓寄柩之家刻期遷葬其
無主之柩俱責令地方鄉約移瘞義地並標記姓
氏以待認領於是多年枯骨悉歸窆窆士民頌之
次年陞任去猶捐廉寄津以助延生社善舉

謝子澄字雲舫四川新都舉人咸豐二年知天津
縣有政聲三年粵匪由滄州竄至城西之稍直口
勢張甚邑同民劉繼德者素驍勇因事繫獄子澄
出之諭以大義繼德感激願効死招集同民數千

子澄親率練勇與繼德迎擊於得勝口斬其渠大
敗之津民弋梟者曰雁尸子澄預募數十人俾匿
小艇中賊敗竄呼渡時已昏黑排銃突發賊驚遁
城危而復安後勦賊至靜海縣身受痛創赴水死
之有衙役于鵬龍者同時殉難越日負子澄尸出
面如生時旋奉

特旨照布政使陣亡例議卹諡忠愍入祀昭忠祠同治九

年祀名宦祠津邑人士建立專祠於北門外

案此傳最

有關係殊嫌文繁而無當今參考周詢知其始出
師時因眾請誰督諸大僚無言而忠愍慨諾眾遂
爭先此功所由成也嗣隨大軍與佟統制以忠義
相契約爲兄弟此戰因急奮救佟被識面者大呼

生致遂受重傷且虞被辱遽赴水死逮忠骸歸署
闔城哭聲震地焉既建雙忠祠於永豐屯復建專
祠於城隍廟西以便瞻禮兩祠並肖像旁列從死
諸人儼然當今衣冠尤爲他廟貌所未有蓋津人
多工作傳眞而又親炙既
久故能妙肖洵榮哀已

譚正瓏四川射洪人乾隆四十六年任天津典史
邑故多賭博其公行於閭巷者以錢八或六擲木
板上分字幕辨局勢以爲勝負每擲自一文至數
千文不等被誘者往往因此敗產甚或輕生公惡
之嚴行查禁遇則奪其具而杖之此風遂息俱同上
楊霞臨淄人知青縣性甘淡薄政尙寬簡增修縣
志修廢舉墜操守清潔從無暮夜之金卓不可及

縣志

以下青縣

案楊劉皆康熙

初嚴在雍正初縣志倒置今更正

劉允恭遼東人慈祥愛民值久旱虔禱霖雨霑足
嚴霖浙江歸安人禮士愛民弭盜保甲悉著實政
時值水災捐築隄防請粟賑貸存活無算萬民咸
立旗杆因公罣誤離任爭赴各上憲保留

周碩勳湖南舉人知青縣乾隆八年民大饑加意
撫卹一切賑務寬而有制舞樊一清民沾實惠至
今頌之陞北運河同知

葉志寬廣東進士知青縣六年民無擾累陞河南
裕州知州

沈聯芳江蘇元和人嘉慶六年知青縣值河溢被水次歲旱蝗滄靜閒均優免正賦獨未及青亟向大吏條分縷析慷慨請命遂得入告邀

恩縣志修於康熙十二年厯百餘載捐俸倡修成書而於

河道尤詳

俱同上

何蘭馨字薌柏河南息縣人道光乙酉舉人厯知新城青縣等縣爲政嚴而不酷明察如神吏胥皆凜凜奉法每聽訟坐堂判決務得其情

采訪冊

金大鏞浙江吏員任青縣主簿居官清慎賴室人

紡織以供食後卒於官

前志

謝棠字小林密雲舉人秉鐸青學和平樂易維持
名教出力振作以揚士氣闔邑紳士撰壽屏以彰
功德並額斯文砥柱用誌不朽

縣志

尙應武富平人滿洲籍知興濟縣因河口決日夜

築隄以勞卒於官

青縣志案前志於此以
下三人皆誤興濟爲青縣

杜旭豐城人舉人順治九年知青縣事心存惠愛

政尙寬和訟無偏枉事無廢弛民懷其德

前志

劉文振南和貢生秉鐸前後十五年和平樂易遊

其門者有光風霽月之思陞永平教授卒其子扶

櫬過青送者皆爲泣下

縣志

法寰字怡雲膠州人明天啟丁卯舉人

國初除靜海知縣值歲大祲首捐俸散賑并勸當事

者出粟千斛煮粥以濟飢民全活無算癸巳秋膠

鎮海時行叛時寰里居聞變罵賊死之二子爽選

皆遇害入祀鄉賢祠

山東通志
以下靜海縣

吳貽誠字荃石桐城人以主簿陞知靜海縣葺書

院增膏火邑瀕海遇旱蝗起乘其未飛募士撲之

踰年大水力請上憲按籍給賑存活無算

安徽通志案

法吳二員皆不見職官吳固未知何代擬將法補
列於首因見前志縣志職官均列法於萬厯又經
五任而後明亡並非鼎革之際矣且於萬厯後四
五十年均闕任年絕無可資推驗者也至吳之姓

名行事更無一字可徵嘗謂據輿誦宦績以定鄉評則可若轉取家鄉之傳證成宦績則非但歸老易爲十斛麥且述祖德每有過情此類皆難遽信故於此發凡焉

史寶徵字璞山陝西華州人道光丙戌進士翰林院庶吉士散館選涑水縣知縣十二年調靜海知縣歲值水災詳報上憲未准詳報數次乃准民得賑卹全活者眾旗民爭地之獄不徇情不畏勢追地歸民今書院租田是也兩事俱摘頂戴矢之靡他真心愛民民久感之

據縣志職官下注補

石拱極字天一光州進士授靜海縣知縣調任吳江將行念靜海歲歉邑多逋賦終遺百姓累稱貸

代完河南通志

馮雲字石洲四川舉人知靜海縣捐五百餘金置

書院義田至今猶食其利縣志

劉煦字筱伯山西趙城縣人道光丁酉選拔才氣

開展政績卓著仕至大順廣道卒於保陽省南百

姓聞之哭聲徧野同治初據紳民呈請奉

旨准建專祠政績付史館立傳繼又以防守大名郡城

擊退逆匪舊績追贈按察使銜縣志職官下注案鹽山縣志名宦

有傳云湖北布政使體重子也

江安瀾字曉波廣西舉人知靜海縣咸豐三年髮

逆入境勢孤不敵投水死之

同上

許榮昌奉天人順治二年知滄州仁慈多惠政至

今滄人思慕不忘

州志職官下注
以下滄州

龐宗周奉天人順治六年知滄州果敢有擔荷釐

奸剔弊豪猾斂手擢山東兗東僉事

同上

申偉抱遼陽貢士順治七年知滄州清理逃亡減

除荒地民困以蘇陞知泉州

前志

祖澤潛奉天甯遠州進士康熙九年知滄州御下

寬平勤於造士壬子科文武中式者十有一人纂

修州志蒐輯爲勤陞禮部員外郎

州志職官下注

李永純康熙十二年由廕生知滄州時滇黔變起
徵輸方急永純催科不擾民困以蘇其恤夫役戢
姦頑尤得爲治之要

同上

閔三元奉天廣甯貢士康熙十七年知滄州值歉
歲多方賑濟不致流亡州濱衛河尤以河防爲急
築隄濬流禾稼無害時天津道胡應麟誅求無厭
三元稟揭部科都御史魏象樞據情參劾應麟得
嚴譴一時仰其風節

魏象樞寒
松堂集

王洪遠知滄州廉介自矢值歲饑不及詳請開倉
賑濟竟以擅賑去官州人感德爲立生祠

州志職
官下注

姚孔瑄江南桐城人康熙四十二年知滄州時歲歉民飢有

詔賑濟孔瑄復自捐貲加賑兩月值

聖祖南巡供備無缺事集而民不擾迄今歌思不忘值時

初設滿兵駐防兵民未習往往搆爭孔瑄平情聽

斷無所左右且化導多方由是兵民輯睦焉

州志稿

董思任山東平原人雍正七年知滄州精明果斷一時豪強遁跡時陞州爲直隸州率紳民勸建考

院士林德之

同上

張奎祥字星五華容人雍正己酉拔貢知遷安縣

善聽斷熱河等關重案檄往卽成信讞十二年擢

知滄州嚴禁包納修築南關隄岸州人呼爲張公

隄

湖南通志

徐時作福建建甯進士乾隆七年知滄州勤幹有

爲百廢具舉重修州志考訂詳贍

州志稿

周世榮河南祥符縣進士乾隆五十八年知滄州

仁恕有惠政重修舊州東關北關等處橋梁以利

行人嘉慶六年大水辦理賑務民需實惠州人獻

飢溺由己匾額並萬民衣繖以久奉例禁辭在任

九年陞福建興化知府去時士民祖餞十餘里有

泣者

秦光辰湖北漢陽縣進士嘉慶二十年知滄州禮
接紳士栽植儒生以振文風端士習爲已任罷官
寓會城清貧如洗州人醵金餽旅費者不絕遺愛
於滄者深矣

竇景燕字爾東山東臨朐縣舉人嘉慶二十三年
知滄州性嚴猛不接紳士尤長於緝捕聞有盜藪
輒親往雙椎數十觔馬上運之如風遇賊躬與賊
鬪無得脫者終其任宵小絕跡州境夜不閉戶焉
畿輔牧令緝捕才以景燕爲第一陞順天南路同

知

潘國詔字雲留浙江永康縣拔貢道光元年知滄
州安靜息民獎勵士子無厭倦重建渤海書院增
膏火資其他廢墜亦多修舉在任無赫赫名民久
而思之

俱同上

知慶雲縣事勤明白厲縣境肅清振

興文教課士尤勤其時縣志未修者垂百餘年國
詔與邑人崔旭重加編輯體例井然凡十有二卷
履任七年調交河擢知滄州引疾歸弟國耀舉人

時在書院校士云

慶雲縣志

李德字吉人陝西華陰縣進士道光十三年知滄

州有治劇才因地制宜寬猛兼濟能用人而不爲
人用歲馭饑設法捐富濟貧全活無算在任六年
令行禁止吏畏民懷陞知深州後滄州紳士與胥
吏構訟上控上憲俾來滄治其獄無枉無縱眾益

悅服官至山東巡撫

州志
稿

郭紹曾字魯堂山東蓬萊縣進士道光十八年二
十二年兩署滄州親賢好士振拔寒畯每逢月課
必親自考校集諸生童口授指畫娓娓不倦獲其
益者甚多士論翕然有甘棠之愛焉

同上

沈如潮字月海浙江桐鄉縣人嘉慶庚午舉人道

光二十九年知滄州治尙清靜喜文士公廉明察書吏不敢欺咸豐三年粵匪犯直隸集紳士倡議團練募勇千餘人又捐修城垣九月初祭鎮海門放塹水工方興而賊至如潮與城守尉德成迎戰於紅孩口火藥車焚勢敗馳歸守城賊焚迎薰門入乃令眷屬悉死賊執之索銀厲聲曰

國帑不能與賊賊怒批其頰拽至富順當店命其跪不屈脅之降不從遂被害子監生康吉兄如江姪康升壻同鄉舉人四川候補知縣姚學蘇幕友嘉興諸生徐炳榮海甯州管品三門丁何煜家人王

瑞李祥廚丁王條翟姓均被殺姪孫承熾自縊奉

旨建專祠死者一并附祀

滄州于光褒弔知州沈月海詩
坏土誰埋碧血香神光猶為護

靈牀築城伊始嗟三版練勇無多僅半行肘掣那
堪同子賤齟穿空自說睢陽中郎去後知音少瞥

見瑤琴已斷腸

滄城殉難錄

陳鍾祥咸豐三年知滄州時粵寇未平土賊蜂起

鍾祥來攝州事立置亂民二十餘人於法掩骼埋

趾賑窮恤患寬嚴互濟州民大悅又請賑難民請

蠲本年下忙錢糧皆得

旨允行統兵帥臣擬拆捷地減河閘引水以資防禦公曰

如是則東北數百村皆成澤國矣委婉稟陳竟寢

其事自捐資募勇數百人於捷地防堵閭里得以
無擾時大營令州縣勸捐高唐軍營來索滄勇數
百人皆不動聲色而事以濟後以同知直隸州陞

用州志
稿

劉體中雲南昆明進士咸豐五年知滄州涖民廉
正不欺以丁艱去任窮困死

項桂輪字少琴安徽廬江縣監生同治七年知滄
州性果毅鋤暴安良民皆畏而愛之年饑請賑緩
徵又請挑河飢民賴焉教匪段春和將爲亂事急
弗請上憲卽調丁壯擒之作事敢決如此十三年

以痰疾卒於任

孫文驄江甯監生滄州李村巡檢抵任三日與匪
破城堅守獄門不動賊縱火被焚死俱同上

白龍昇滿洲人順治三年知南皮賦性剛毅言動
率真初任卽自言不愛錢不徇情面後果然遇大
兵眾皆畏懼乃挺身自理費省而且得歡心獄訟
立爲剖決鞭扑不施威德所及境內安堵催租無
暴吏而輸納爭先當圉佔時多方護救心力俱竭
至今咸頌仁明陞太守終憲副前志以南皮縣
何中舉字文遠遼陽貢士順治七年知南皮縣事

值大盜就撫而餘黨未靖人多疑畏履任後集鄉
勇置馬匹器械操練精銳獲不悛者立加重刑遂
帖然邑固僻境明季漸爲孔道輸挽不息民累特
甚因詳請革除之刑省政平畿內稱循良無出其
右大計卓異

賜冠服陞磁州知州晉江甯知府

同上

馬士瓊西充舉人康熙十年知南皮縣時山左盜
出沒境上游匪多爲之窟道士瓊稽土著察流寓
禁游惰農隙時募勇訓練分曹部署擇民中沈毅
者統御之一境肅然先是徵賦多踰額賦旣重稅

亦多不如程民苦鞭扑至有棄地轉徙者士瓊一如經制民咸感說邑去海數百里鹽多私販士瓊遣役密爲偵察並移檄屬境協力捕治皆斂跡逸去復懸賞緝逃民猾胥不得緣爲奸利有訟者推誠勸諭至於父子骨肉之際未嘗不流涕而遣之防卒爲民患士瓊立威痛懲邑賴以安

縣志

魏運世字會期江西廣昌拔貢知南皮縣縣爲古渤海地疏下游七十里通積澇水患平蝗災設法

趨之未幾卒於官

廣昌縣志

鍾諤字一士山東益都進士任河閒府同知順治

十七年奉委查荒民受其惠縣志以下鹽山縣

王永茂字恆庵奉天貢士河閒府同知康熙三年

查旱災六年查水災各蠲稅十分之二同上

錢廣居字大可太倉州舉人順治元年知鹽山縣

廉靜不苟弭盜有方政最陞工部主事祀名宦前志

董良性遼東人歲貢有經濟才署鹽山縣事兩平

巨寇為立碑紀功慶雲當殘破之後賊據腹心公

從容畫策協李尹拔其根株慶民賴之慶雲縣志

費鉉字遠馭浙江桐鄉拔貢康熙二年任鹽山知

縣剛毅有為威墜漸舉以勞瘁疾卒於任有功德

方志

朱鸞字翔千江南泰興貢生康熙五年知鹽山
邑承凋敝後清田賦理詞訟緝逃人捕盜賊崇修
廟學整理廨舍蒞政五年百廢俱舉治績爲一時
冠

黃貞麟字方振山東卽墨進士康熙九年知鹽山

縣剛正嚴明無所瞻顧刊碑革弊修學禮士皆殺

然爲之陞戶部主事士民立碑以誌遺愛

附錄所作鹽山

口號六十韻作吏自述苦余每笑其愚述之雖媿
媿聽者徒擲掄余今來鹽山乃信言非迂平原百
餘里一望盡荒蕪衰柳殘蒲閒惟見狸與狐村落
數晨星頽垣若平塗男婦皆操作出入無完襦行

行近城郭野老爲前驅睥睨多殘缺往來成通衢
城中鮮民居祗有東南區土屋似穴處斥鹵遍闔
閭敝廬十餘閒宛如荒利孤卽此縣衙署使君莫
踟躕堂宇舊傾斜大半少門樞短牆可排闥四壁
走踈蹠牆外見汙池翩翾飛雁鳧胥吏索俸錢買
米充庖廚今日踰小市明日乏午餉粗糲可以飽
何敢望豐腴中宵狂風起紛紛落巖壚月色照榻
上夜無鈴柝夫中外悄然靜高槐聞曉鳥心悸不
能寐倉皇胥吏呼荒城太寥闊盜竊向有無胥隸
復使君此事誠可虞渤海佩刀劍從未盡根株今
又臨旗屯處處憂萑苻公然攫白晝不必問穿窬
再詰何以故境內多逃逋旣受賊役累又爲逃人
誣輕亦蕩家產重則株婁拏東臨大海濱往時設
網罟捕魚作生計亦可辦稅租年來海防嚴功令
禁船桴寸木不許入犯之法必誅衣食無所藉私
販聚鹽徒窮極且健訟鋌而走險途長吏旣傳舍
殘黎脂膏枯撫字望使君幸極爲生扶聞言步庭
除一歎一長吁補救縱無術不敢憚勤劬日旰未
退食矢心食茹荼但能完正賦忍復科錙銖息訟
類鄉老惟慮逮無辜防禦清保甲口爲之卒瘡恩

恩趨上谷爲繪窮民圖再拜啟撫君前言備陳敷
剗切幾痛哭撫軍慨以俞旗屯肆虐害其患在切
膚卽日拜章奏必不緩須臾餘者假便宜當與俗
吏殊辭歸過滄河市井饒屠沽長隄驅駿馬攜妓
美且都壯士持弓矢優人抱笙竽甫自畫船來高
樓呼醍醐紅袖脩清歌樽蒲雜呼盧日日逞鮮肥
夜夜足歡娛借問伊何人上役及屯奴聽之長
太息憂心如轆轤若輩旣如彼鹽民安得蘇

熊士晉字詠庵湖廣江夏人康熙十七年由貢監
知鹽山縣緝盜有方民賴以安十九年旱饑流民
載道士晉倡捐七百餘金立粥廠於南關望樹鎮
活數萬人

楊可喬湖廣進士康熙閒令鹽山培養士氣子惠
黎元勤敏任事一意除莠安良廉靜不苟莅政三

年病不遑攝宵小擠之以卒士民懷思不衰邑進士趙炯爲賦黃花詩

商衡浙江人進士高第乾隆中知鹽山縣性直易與人無城府操守峻潔精折獄案無留牘尤留心文教書院俊秀者皆加培養迄今百餘年故老尙稱其廉明焉後二子皆成進士次載以翰林持文柄官至太守人謂循良之報

胡以昭字朗山廣西舉人父德琳官山東守令文學政事卓著一時以昭名父子由阜平調鹽山能紹家聲守身以介撫民以慈尤留心約束胥吏俾

懷懷畏法度政清刑簡訟庭寂靜雅意親賢而門
無私謁鄉大夫學優品端者式廬敬禮曰古澹臺
氏也營營者胡弗鑒諸卒於任居無赫赫名後常
見思遲之又久百姓猶有胡公清劉公明之頌

劉慶麟字蕉林江西崇仁進士嘉慶二十二年知
鹽山縣終日坐堂皇任吏民白事有訟獄立判決
無稽留者時言者以海濱開墾陞科入告奉檄嚴
查鹽山東北鄉多草荒地慶麟依例勘辦不激不
隨國課無虧而閭閻亦不擾卒之日弔者如市時
有胡公清劉公明之頌

尹式芳

新通志
式誤士

字菊田山東厯城進士咸豐三年

署知鹽山縣九月粵匪破滄州鹽與滄接壤土匪
乘隙蠢動四境騷然式芳激厲紳民與武舉劉光
勳等倡團練得義勇數千人民氣爲之一振某鄉
擒匪三人至斃之後各團擒賊送者百餘皆訊明
正法人咸賴之

劉文彥字子美唐縣進士任鹽山教諭學問淵深

乾隆年承修縣志言簡意該有裨邑乘

俱同
上

張必科蓋州人恩貢順治四年知慶雲縣下車兩
閱月宿弊盡革民荷更生

國初鄰邑寇盜無日無之必科每遇寇至卽鼓聚步
騎親出逐之簡鄉勇嚴保甲城壞者補之濠淤者
濬之規畫未就巨寇猝集乃率眾登陴以忠義鼓
勵人皆願爲盡死惟城修未完難於固立遂更勵
眾據守箭無虛發苦乏外援忽弦斷手傷擲其弓
曰命矣當尋一死所也挺戈下城賊環圍之亦不
敢逼舉火自焚直指上其事於

朝贈爲僉事邑人爲立碑記祀名宦

前志以
下慶雲縣

李芳春蓋州人順治五年知慶雲縣當殘破之餘
以弱冠蒞任身若不勝衣語若不出口賊甚易之

乃陰與訓導董良性鎮防郭天培潛謀密策談笑以除腹心之寇勦捕餘黨二千餘人訓練鄉民盜賊不敢入境民感再造之功

張碩抱項城人拔貢順治十一年知慶雲縣丰裁英毅幹理周詳爽豁明斷案無留牘修理學宮築濬城池補葺廟宇興廢舉墜若恐弗及嚴查保甲簡練行伍文事武備燦然有條奸人匿名羅織紳衿耆老保留者數百人竟不能得去之日老稚遮道送之行李蕭然清操不愧古人

徐州牧濟甯州人進士知慶雲縣爲治廉平寬簡

課農勸學綽有政聲性剛直不阿權貴後以鹽課
誑誤去官輿論惜之

盧元培字鵬鵬仁和人進士康熙三年知慶雲縣
事德性寬裕政治和平蝗災申請得准民賴存活
催徵有法敲扑不施亦無逋賦爲治務得大體不
獵近名不責小過邑當紛糾之際人情不一獨能
不偏不倚治之綽然丁憂去任民士懷思服闋補
戶部主事陞山西學道

俱同上

李居一字元公岐山人恩貢歷任巴縣邵武霍縣
調補慶雲老成勤謹催科有法詞訟必得其平績

修縣志蒞任五年始終一轍遷臨江府同知

縣志

李興祖字廣甯奉天鐵嶺人康熙十三年知慶雲縣均田賦嚴保甲建社學修邑志興廢舉墜卓有賢聲官至山東鹽運使

韓契滿洲人康熙四十一年知慶雲縣老成練達多惠政饑煮粥以食飢者四十三年大饑力請蠲賑民賴以生時盜賊竊發契恩威並用人倚之如長城後以憂去

吳煥浙江錢塘人康熙癸未進士五十一年知慶雲縣才恢學廣敏於吏治蒞任數年不延幕友簿

書案牘分析無留滯邑數有疑獄煥發伏摘奸洞
鑒如神天津副使檢災至縣滄鹽士民沿途投牒
皆乞檄慶雲縣審理其能聲動鄰封如此後陞府
丞

李炳生字曜如陝西岐山舉人雍正九年知慶雲
縣作養士類約已惠民嘗督河工見役夫曝背跣
足爲之隕涕因事罷官囊無長物邑民競齎薪米
以供朝夕左遷學博士民思慕焉

金士仁字嗣山安徽歙縣進士乾隆五年知慶雲
縣八九年邑大旱請賑又

詔發帑金爲民穿井種樹買牛實心奉行民被其澤邑土瘠賦重申請當路奏聞減額徵地糧十分之三卒於官士民哀痛如喪私親

孫爾周昌邑人進士通達治體吏無遁情庭無留獄百姓便之

完顏岱滿洲人仁明強幹初蒞任以邑貧申免徭役未幾去任民爲製衣傘送之

汪菁字文藻樂平人舉人知慶雲縣崇尙節儉慈惠愛民聽獄不動聲色爲剖析曲直訟者自服引疾去官僑居僧舍村農齋土物問視者絡繹不絕

貧不能歸邑民醵金送之

張元英號秋谷膚施人舉人知慶雲縣寬厚愛人
爲治務得大體宏獎士類修聖廟建書院多士皆
爭自淬磨嘉慶四年卒於官從子井在署讀書以
嘉慶辛酉登第官至河督

胡懋謙大興人順治辛卯舉人十年任教諭強毅
有執植士氣嘗攝縣事治先德化民戴而思之

梁可薦沙河人樸茂真率不事矜持言動由衷而
發毫無欺爽日以講學爲事剖析經義務盡底蘊
誘掖諸生率爲良士

楊芳肥鄉人曠達有氣節喜談論侃侃自持延接諸生藹然真切若家人子弟年尙康健勇於求退歸之日囊篋蕭然人皆愛之戀戀不忍別

俱同上

任鼎山陰人任慶雲縣典史順治十二年馬寇逼城率眾禦之以眾寡不敵力竭遇害

前志

居官儉素

能持清操貧不能歸葬占籍慶雲人過其墓無不

墮淚焉

縣志

趙良棟甯夏人康熙十二年官天津總兵整隊伍勤簡練士馬雄勁爲諸鎮最

大清一統志

天津素稱盜

藪旗丁鹽販通行囊橐白晝大都攫入而奪之金

吏莫敢訶問良棟申法制立程約張設耳目窮治
根柢務在鋤強暴以惠孤弱於是奸宄屏迹部告
無事

嚴太僕集

累官四川總兵加兵部尙書諡襄忠祀

天津名宦雍正十一年

特旨入祀賢良祠

舊通志
以下武官

藍理字義甫福建漳浦人從靖海將軍施琅征臺
灣戰於澎湖身被十餘創腹背腸出以匹練連腹
背裹之卒破賊以參將用尋丁憂康熙二十六年
服闋入都抵趙北口蒙

召問戰狀視傷處

重修天津府志

卷四十

宦績

主 光緒戊戌

獎賞殊異授神木副將未行擢宣化鎮總兵掛鎮朔將軍印四十二年調鎮天津理以畿輔產米無多而天津一望皆平原可開河引水灌稻田乃躬率兵士墾鑿得水田數百頃歲收豐稔

上悉以賜理錫名藍田爲世業四十五年擢福建提督正

事略

黃廷桂漢軍鑲紅旗人乾隆三年授天津鎮總兵邑地狹人稠乾隆元年禁民船販奉天米石民益乏食廷桂與直督李衛會疏極言民運之便乞開禁得請

天津縣志

五年遷古北口提督董率有方將弁

兵丁勤於練習

上嘉之後官大學士封忠勤伯卒諡文襄祀賢良祠

舊通志

丑達滿洲正白旗人乾隆二十六年官天津鎮總兵辛巳水有司匿不聞適赴都

上問訓練事丑達以城外皆水無訓練地對案驗如達言於是有司罷黜且施賑民得不飢每歲糧艘回空幫丁以所餘食米在津變價爲路資兵弁藉端詐索丑達曰國課無虧而自賣其餘粟何罪之有置不問去任之日百姓以酒餞送之

天津縣志

永昌伊爾根覺羅氏滿洲正藍旗人乾隆三十九

年署天津總兵八月山東逆匪王倫滋事隨同進
剿兼顧天津民以安堵賊平議敘四十年授天津
鎮總兵五十二年卒

大臣
列傳

蘇甯阿字壽泉號迂庵滿洲人乾隆閒任天津鎮
總兵官體恤屬員仁愛士卒向例鎮署宴客營弁
備酒筵公從不留賓而亦不赴人約性廉潔每典

衣以繼饔飧工詩善書

天津
縣志

薛大烈甘肅甯夏人嘉慶九年以功授天津鎮總
兵邑俗多械鬪大烈痛懲之夜擒巨匪數人置於

法邑民獲安尋陞提督

同上

周天命武舉陞天津鎮標中軍副將管參將事唐

官屯勦賊陣亡

傳月詳人
物前志

李崑字寶林江西義甯進士嘉慶十四年官天津
遊擊蘇花臉者劇盜也聚眾數十人晝伏海船夜
入人家掠金帛婦女無算官吏畏之不敢發崑偵
得寇狀謁總鎮辭大烈密告以故大烈卽整飭士
馬命崑爲前導漏二鼓馳入賊船手刃十四人頃
之大烈兵至羣賊皆就擒守天津十載和靜寬恕

兵民悅服

義甯
州志

張德遠字寰字順天大興人尙氣節多智略官縣

河遊擊時方草昧野多奸宄德遠撫循緝捕恩威並用盜息而民以安焉後由廣東致仕歸過滄滄

人留之

滄州志

沙春元河南鄭州人任甌河遊擊有勇力咸豐戊午直沽防堵以礮擊沈英船一隻勢急或勸下臺暫避按劍叱之中礮死同死備弁李墉石振岡常

榮魁趙國璧

采訪冊

張化龍山西武進士咸豐八年任天津左營守備

同治二年六月十五日隨署提督恆齡勦賊臨清

州迤南深入遇伏陣亡

同死者都司銜守備陳光裕城守營把總華雲彪右

營外委李鉅大沽前左營把總孟毓奎前右
營外委高崇俱天津人 據縣志人物門補

張傑陝西長安人康熙間由行伍任天津衛守備

多善政去任之日民爲罷市

天津縣志

德成字仁齋蒙古鑲白旗人道光二十六年任滄
州城守尉公廉勤幹素得士卒心咸豐三年粵寇
北犯陷獻縣交河入南皮逕犯滄境丙寅有白氣
如環半壓城上移時而滅林鳥多墜地死丁卯大
霧辰刻賊至州南二十里之捷地德成率漢勇四
百餘陣於紅孩口河隄遏賊北去路奮矛直入立
斬黃衣龍帽賊渠一人復生獲數人我軍益奮銳

礮齊發賊前鋒傷斃無算遂敗之追北五六里我
火藥車忽自焚賊蜂擁至德成親督戰殺賊數百
人賊悉眾來抗乘風勢用噴筒巨礮傷我兵幾半
復分兵攻西北兩門焚小南門入德成急入城焚
火藥庫持刀巷戰傷重赴水死之賊歎曰此鐵漢
子也出之水以黃綾裹其屍而去妻沙氏亦自焚
死事

聞從優議卹並准建專祠

如皋徐嵩年滄州城守德成戰詞城南陣合壞雲屯封豕長蛇

勢亂奔萬古青編懷奇節一池碧水浸忠魂闔家縱火周甯武轉戰無援楊雁門一死如公含笑去不隨新鬼哭黃昏

滄城殉難錄

鳳翔字輝廷滿洲鑲白旗人滿洲防禦咸豐三年
廣西賊犯滄州鳳翔派守東城賊至徒步入陣手
刃乘白騾賊渠躍登其騾而戰兵敗入城促家人
速死脫官服登城至汛地以守賊入復歸家冠服
而出巷戰死之子樂善妻傅氏抗節被害女三人
孫女二人亦同時死興成字子集滿洲鑲白旗人
蒙古防禦率長矛隊擊賊礮石如雨或勸稍退成
厲聲叱之中噴筒死子中慶亦陣亡廣昇蒙古正
白旗人滿洲防禦巷戰死賊以黃綾裹其傷處德
音滿洲鑲白旗人蒙古防禦守南城城破北面再

拜亦與四子俱死

多瑞姓索佳字星符滿洲正白旗人滿洲驍騎校

粵匪竄滄州之捷地多瑞挺身出入賊隊所殺甚

多賊分兵潛行隄下突攻西城急歸守城時已被

重創家人往視厲聲叱之以刀砍城輒曰爾等速

尋死所再來視我者與此同城破力殺數賊而死

手握刀不解面如生子德欣德俊孫志明並陣亡

孫志文殺一賊獲其元後令妻子投水自火其屋

賊入格鬪死

滄州駐防桂林驍騎校詩城門乍開礮聲止萬眾駭曰賊入矣一夫挾矛

髮上指大呼誰與敢越此賊騎馳來達尺咫霹靂

一聲發一矢人倒馬奔血噴紫又一騎來矛突起

擲空飛去一痕水賊顧正中王龍尾衝路漸狹賊
斬多霍霍左右揮雕戈亦憤投地目如電長槍大
斧聲戛磨塵昏日黯風轉急賊騎憑陵四面逼血
滿戰袍誰力爭手挂斷矛猶鵠立嗚呼丈夫生世
誰能無死死非其所死亦可鄙高
牙大纛紛於雲如君膽識甯多聞

慶瑞滿洲鑲白旗人鑲白旗蒙古驍騎校粵匪陷
滄州城率子桂嶠與賊鬪死雙和蒙古驍騎校盛
服自縊子嵩配嵩林被殺慶恩滿洲驍騎校亦陣
亡原任正白旗滿洲驍騎校卓啟斯泰字大林年
八十一歲賊人出立門外長子婦曹氏隨侍同聲
罵賊賊並殺之孫和春孫女大姐皆遇害次子多
順陣亡原任鑲白旗蒙古副驍騎校添祥年七十

一被殺妻女皆從死

奪魁滿洲人正白旗滿洲副驍騎校性忠直嗜學
精騎射文通滿漢教家以孝弟爲本咸豐三年粵
匪至滄州魁督辦火藥及賊至神色泰然莅事弗
懈城破或告曰東門可走曰吾世受

國恩誓以死報去此非吾死所也事急飭人燒火藥
庫賊入巷戰矢盡短兵接賊圍數重招使降憤罵
不絕口傷重猶力殺數賊而死妻趙氏與兩女縫
戰衣從容若平日或勸之逃曰丈夫誓死報

國婦女雖驚弱肯蔑義偷活耶率兩女投水死

滄州
于光

褒弔奪魁詩壞雲壓陣城門開營頭星墮聲如雷
萬騎黑山捲地至乾坤一髮成塵埃奪公矯矯剛
且毅精忠自有凌雲氣平時掃地賞名花今日持
矛隨都尉都尉相從衛水頭殺人如草陰風愁已
聞兀术金山敗俄見蕭王深岸投臣力已盡鉛丸
絕虜馬奔騰飛電掣誓埋碧血三尺土賸有丹心
一寸鐵日昏霧慘畫冥冥婦啼兒號不可聽斷劍
折弓爭地棄將軍馳馬奔流星傳箭急呼焚武庫
白虹一道走天青孽龍掉折天王旗霹靂下擊陰
兵馳忠魂浴血天如墨空裏仙娥聯袂隨一家忠
孝足千古留得孤兒掃墓土連天
風雨獨歸來夜冷更深夢金鼓

正白旗蒙古副

驍騎校武成守西門戰死子嵩凱嵩年孫恆利恆
來俱死正白旗滿洲副驍騎校滄泰守東城率子
那慶戰死鑲白旗滿洲副驍騎校鳳鳴陣亡子那
善亦被殺鑲白旗滿洲副驍騎校察興阿坤祥守

北門同罵賊死正白旗滿洲副驍騎校貴明守小
南門用礮擊傷二百餘賊城破自縊死鑲白旗蒙
古副驍騎校桂連兵敗有勸之走圖後効者不肯
去大呼曰此我輩報

國時也遂歿於陣

劉世祿本滄州劉氏後徙慶雲縣祖揮官遊擊陣
亡世襲雲騎尉世祿襲職咸豐三年任北堡千總
兼署南堡印聞我軍與賊接仗策馬赴戰或曰滄
兵少恐不利世祿指其頂戴曰此吾祖所留貽也
不往何以對吾祖本汛兵僅七人卽率以往時戰

方鏖城守尉德成遙呼曰君勿俱死也君有禦侮才滄城賴君者甚多世祿曰去者必不來請爲大人殺一人發三矢殪三人衝入賊隊又殺數賊見火藥自焚知必敗即以印割付汛兵令去復轉戰力盡死身無完膚尸爲賊所焚

俱同上

劉松山湖南湘鄉人忠勇多大略轉戰湖南等處十餘省所向皆克有古名將風以功洊擢廣東陸路提督同治七年追剿捻逆由陝晉入直隸全股蕩平拜黃馬褂輕車都尉世職之

恩九年攻甘肅逆回中礮陣亡奉

重修天津府志

卷四十

宦績

夫

旨入祀昭忠祠

新通志

郭松林湖南湘潭人以驍勇名屢著戰功同治七年勦西捻嘗敗賊於安平又敗賊於饒陽張總愚趨東光犯運河松林擊走之又敗賊於滄州天津等處捻逆之平松林與有力焉光緒六年授直隸提督甫視事卒奉

旨賜卹予諡

同上

卷四十終